

ادامه به مستعد و صالح اولامایه جعفری ایما و ادعا ایده جک اولانلرده بولنور.  
 بو مطالعات وارد خاطر اولاییلور. فقط بز مسلمانلرک - تورکلرک - حال  
 حاضرده کی، سطحی مدققلرک کورور اولدقلرینی ادعا ایتدکلری - ملکه  
 واستعداد سزلنمز و ارسه، استقبالک علائمندن دکل، ماضینک خصوصیاتنددر.  
 جدی بر نظر تفحص بزم حائله بیلمز قوی بر عزم و اراده ایله راه ترقی  
 و انکشافه میلان و سیرانمزی و بو - طبعی و قطعی اولان - سیلانه قارشو طور مق،  
 هم ناموافق و همده ناقابل اولدیفنی تسلیم ایلر. شمذیلک حیات و مناسبات  
 اجتماعیه مزده طور غولغنه، مسکنته قورقار کی اولان مرضیت، نقاهته، و قیصه  
 بر زمانده زندگی تامه مبدل اولاجقدر. بونی احضار و استکمال ایچون،  
 شرائط و ایجابات انکشاف و تعالیمزی مدرک و صاحب اولما مز لازم، محافظه  
 و استردادینه یورولمق و اوصافق بیلمز قرار و قناعت ایله چالیشمه مز باشلیجه  
 وظیفه مزدر.

بوتون بو ملاحظات و مطالعاتک، بالخاصه زمامداران امور ملت مزجه،  
 اهمیتله موضوع تحلیل و مناقشه اولسنی تمی ایده رم.

سا طاشلیجه: تشرین اول سنه ۹۱۹

توفیق طاهر



بوسنه و هرسک محاکم شرعیسی

اوستریا - مجارستانک سابق بوسنه و هرسک حکومتک قانون قوتنده  
 اولان سا ۳۰ تشرین اول سنه ۱۸۸۳ تاریخ و ۷۷۲۰ نومرولو امرنامه سیله  
 اهالی اسلامیه ایچون محاکم شرعیه تأسیس و دائرة صلاحیتی تعیین اولمشدر.  
 امرنامه مذکوره یکرمی ایکی ماده یی محتوی اولوب قضالر محاکم  
 شرعیه سیله دیوان تمیز حقوق شرعیه نک تأسیس و یواییکی درجه محاکم  
 هربرینک وظیفه و صلاحیتی بیان ایتمشدر. هر قضا محکمه سنک بر جزئی  
 اولمق اوزره محکمه شرعیه بولنوب برر قاضی و بعض قضالرده کثرت نفوس  
 و مصالحه کوره بر ویا متعدد نائبین واردر. محاکم شرعیه ده حاکم منفردک  
 اصول جاری اوزره رؤیت ایتدیکی دعاویدن طولانی حکم اعطاسی قاضیه  
 ویا نائبه عائددر. بوتون بوسنه و هرسک ایچون سرای بوسنده دیوان تمیز  
 حقوق شرعی محکمه سی ایکنجی درجه ده و صوک حکم اولمق اوزره قوار  
 ویرمکده در.

دیوان تمیز شرعی اوج نفر حکام شرعی ایله دیوان حقوق نظامیه نک  
 بر حاکم نظامیدن مرکب هیئت مجلسنده قرار و حکملرینی اعطا ایدیور.  
 تمیز شرعی مجلسنه حکام شرعیه دن اک بیوک رتبه و صنفی حائز اولان  
 ذات ریاست ایتیمکده در. حکام شرعیه سائر مأمورین رسمیه ایله کرک  
 حقوق و کرک وظیفه جه مساویدر.

علی الاطلاق مأموریت قرائق ایچون آرانیلان اوصاف و اهلیتدن  
 بشقه امور شرعیه ده لیاقت و اهلیت لازمه یی ابراز و اثبات ایدنلر حاکم الشرع  
 نصب و تعیین اولنه بیلور. حاکم الشرع ایچون لیاقت و اهلیت و یردیکی امتحان  
 نتیجه سنده اعطا اولنان شهادتنامه ایله اثبات اولنور.

نواب امتحانی مجلس علما دائره سننده رئیس العلمانک تحت ریاستنده  
 دوت نفر مجلس علما اعضالر ایله دیوان تمیز شرعی و دیوان حقوق نظامیدن